



**Silva Semadeni (pss/GR) ha fatg attent a la gronda muntada dals avieuls per l'agricultura en general e per ils territoris alpins en spezial.**

FOTO L. DEPLAZES

# Mesiras per proteger ils avieuls

## Grond engaschi en il cussegl naziunal

DA LUCAS DEPLAZES / ANR

**Il cussegl naziunal ha acceptà duas moziuns en favur da la protecziun dals avieuls. In scumond da pesticids ha el refusà. L'agricultura dovra meds chemics per proteger tschertas culturas.**

*Silva Semadeni* (pss/GR) ha fatg attent a la gronda muntada dals avieuls per l'agricultura en general e per ils territoris alpins en spezial. Tenor Semadeni munta il diever d'insecticids in grond privel per ils avieuls. L'enviern 2011/12 ha quasi la mesadad dals pievels d'avieuls betg survivì. L'onn 2012/13 ha il Grischun pers 32% dals avieuls. En l'ulteriura Svizra han ins registrà ina sperdita da 28%. Ils motivs èn la varroa, il clima e l'ambient. Semadeni è cunscienza che la provenientscha da la muria dals avieuls n'è anc betg perscrutada sufficientamain. Ord quest motiv proponan duas moziuns da la cumissiun per scienza, educaziun e cultura in plan dal proceder per eruir ils vairs motivs da la muria dals avieuls. Il cussegl federal duai plinavanz elavurar il plan per realisar las diversas mesiras. En vista a la complexità dals problems e dals parais cuntravers duai la problematica vegnir perscrutada sin nivel scientific fin l'onn 2015.

*Bernhard Guhl* (pbd/AG) ha cità Einstein sco suonda: «Svaneschan ils avieuls, ha la populaziun sulettamain quatter

onns da surviver.» La situaziun saja vairamain fitg seriusa, ha fatg attent il pledader da la cumissiun che recumonda d'acceptar la moziun cun 14 cunter 9 vuschs.

### Chemia è necessaria

*Nadja Pieren* (pps/BE), la pledadra da la minorità da la cumissiun, fa attent al privel da las moziuns per l'agricultura. In scumond da pesticids fiss fatal per la cultivaziun da products agrars che èn da muntada vitala per il provediment dal pievel. In connex cun il diever da pesticids per proteger las plantas e la muria dals avieuls na saja betg cumprovada. En ils territoris muntagnards na saja la situaziun betg meglra, cumbain ch'ins dovria blier pli paucs pesticids. Pieren fa allusiu a la posiziun da l'Uniun purila svizra che ha admonì da vulair restrenscher massivamain il diever da pesticids.

Cusseglial federal *Johann Schneider-Ammann* ha sincerà che la regenza persequiteschia il svilup cun gronda atenziun. Ils avieuls èn in simbol per ina cuntrada intacta. Il cussegl federal ha gia intradà diversas mesiras per meglierar la situaziun. Concret ha el numnà il center per avieuls (Agroscop), la finanziaziun da studis davart ils avieuls a l'Universitad da Berna ed il sustegn e la coordinaziun da la perscrutaziun naziunala ed internaziunala. Schneider-Ammann ha menziunà il scumond per divers pesticids per dus

onns, e quai sin recumandaziun da l'UE. El ha dentant admonì da restrenscher il diever da meds chemics memia fitg. L'agricultura na po betg desister da meds per proteger diversas culturas sco tartuffels, terc, fluras-sulegl. Il cussegl federal è pront d'acceptar duas moziuns. Ina terza moziun che vul scumandar pesticids refusa la regenza. En quest senn ha acceptà il cussegl naziunal diversas mesiras per dapli protecziun dals avieuls.

### Ils avieuls

La tgira dals avieuls è per gronda part ina lavur da hobi. L'uniun dals apiculturs da la Svizra rumantscha e tudestga dumbra var 13 000 commembers. La gronda part dals apiculturs venda sezza il mel, ina part va a grossists. Mintg'onn vegn produci en Svizra var 2000–3000 tonnas mel d'avieuls en la valita da 50 miliuns francs.

Durant la Segunda guerra mundiala han ins dumbrà en Svizra var 340 000 pievels d'avieuls. L'onn 2000 era il dumber sa reduci sin 200 000 ed actualmain quintan ins cun var 100 000 pievels.